

100 ára afmæli Félags íslenskra hjúkrunarfræðinga

Þriðjudaginn 18. nóvember árið 1919 hittust nokkrar konur á fundi í herbergi sem Lestrarfélag kvenna í Reykjavík leigði í Fjalakettinum. Þessar konur áttu það sameiginlegt að hafa lagt stund á hjúkrun eða starfað við umönnun sjúklinga. Sex nafngreindar konur sátu þennan fund.

Við upphaf fundarins bað fröken Harriet Kjær um orðið og lagði hún til að fundargestir stofnuðu félag til að hjálpa stúlkum sem vildu nema hjúkrun að fullnuma sig í Danmörku. Fundarkonur féllust á tillöguna og var fröken Kjær kosin formaður hins nýja félags. Það var hugsjónin um góða menntun hjúkrunar-kvenna sem varð kveikjan að fyrsta félagi hjúkrunarfræðinga fyrir 100 árum. Allar götur síðan hafa hjúkrunarfræðingar barist fyrir því að hjúkrunarmenntunin sé í hæsta gæðaflokki hér á landi.

Afmælisárið hefst 15. janúar

Félags íslenskra hjúkrunarfræðinga fagnar 100 ára afmæli félagsins með ýmsum viðburðum allt árið 2019. Afmælisárið hefst með dagskrá á Hótel Hilton Nordica 15. janúar. Þessi dagur er merkur í sögu félagsins en þá eru liðin 25 ár frá sam-einingu Hjúkrunarfélags Íslands og Félags háskólamenntaðra hjúkrunarfræðinga í eitt félag: Félag íslenskra hjúkrunarfræðinga. Sérstakir gestir verða Svandís Svavarsdóttir heilbrigðisráðherra og Alma D. Möller landlæknir.

Í mars verða fag- og landsvæðadeildir félagsins með viðburði eða hátíðardagskrá fyrir sína félagsmenn og í október munu deildarnar síðan kynna sig og sína starfsemi fyrir almenningi. Alþjóðadag hjúkrunarfræðinga 12. maí ber að þessu sinni upp á sunnudag. Af því tilefni verður haldin messa þar sem hjúkrunarfræðingar munu taka virkan þátt í athöfninni. Aðalfundur félagsins verður haldinn 16. maí. Auk venjulegra aðalfundarstarfa verður hátíðardagskrá þar sem nýir heiðursfélagar verða kynntir og styrkir til hjúkrunarrannsókna úr vísindasjóði félagsins afhentir sem og afmælisstyrkur til rannsóknar á sviði hjúkrunar. Afmælisrit verður gefið út og var sérstök ritnefnd skipuð fyrir það verkefni sem í eiga sæti Þorgerður Ragnarsdóttir, Helga Ólafs, Christer Magnusson og Anna Gyða Gunnlaugsdóttir.

Sögusýningin Hjúkrun í fortíð, nútíð og framtíð í Árbæjarsafni

Á kvenréttindadaginn 19. júní verður opnuð í Árbæjarsafni sögusýningin *Hjúkrun í fortíð, nútíð og framtíð*. Þessi dagur er einnig merkilegur í sögu hjúkrunarfræðinga því á þeim degi árið 1933 undirritaði Kristján X. hjúkrunarkvennalög sem gerðu starf hjúkrunarkvenna á Íslandi lögverndað. Forseti Íslands, Guðni Jóhannesson, verður sérstakur gestur félagsins við opnun

sýningarinnar. Sýningin mun standa fram í október 2019. Í sýningarnefndinni eru Bergdís Kristjánsdóttir og Ingibjörg Pálmadóttir en Anna Þorbjörg Þorgrímsdóttir, sagn- og safnafræðingur, er sýningarstjóri. Á meðan á sýningunni stendur verða ýmsar upptakur auk þess sem Árbæjarsafn mun bjóða skólabörnum að skoða sýninguna. Öllum landsmönnum verður boðið á fjölskylduhátíð í Árbæjarsafni 15. ágúst. Hátíðin er til-einkuð börnum hjúkrunarfræðinga og öllum þeim börnum sem þeir hafa hjúkrað í gegnum tíðina. Boðið verður upp á ýmis skemmtiatriði fyrir börn og fullorðna og er aðgangur ókeypis.

Ráðstefnan Hjúkrun 2019 verður haldin á Akureyri dagana 26.–27. september. Yfirskrift hennar er *Framtíð, frumkvæði og forvarnir. Getur hjúkrun bjargað heilbrigðiskerfinu?* Afmælisárinu lýkur síðan með hátíðarkvöldverði hjúkrunarfræðinga í Hörpu 15. nóvember. Auk kvöldverðar verður boðið upp á fjölbreytta skemmtidagskrá. Sérstök nefnd var skipuð til að sjá um þennan lokaviðburð. Í henni sitja Guðlaug Rakel Guðjónsdóttir, Margrét I. Hallgrímsson, Anna Guðríður Gunnarsdóttir, Halla Grétarsdóttir, Hildur Björk Sigurðardóttir og Tryggvi Hjörtur Oddsson.

Framlag hjúkrunar frá landnámi

Allir viðburðirnir verða auglýstir nánar þegar nær dregur. Auk ofangreindra viðburða verða hjúkrunarfræðingar og störf þeirra kynnt allt árið, m.a. á vefsvæði félagsins og á facebook. Þá verður á árinu hægt að panta kökur með 100 ára afmælismerkinu þar sem samið hefur verið við Landsamband bakameistara varðandi það. Stofnanir, einstakar deildir, fag- og landsvæðadeildir, útskriftarhópar og fleiri hópar hjúkrunarfræðinga geta pantað kökur að eigin vali og fengið þær með afmælismerkinu.

Að lokum má nefna að afmælisnefndin hefur unnið að því að fá gerða stytta af Halldóru Gunnsteinsdóttur við nýja Landspítalann til að minnast framlags hjúkrunar frá landnámi. Halldóru er getið í Víga-Glúmssögu en þar segir frá bardaga á Hrístateigi í Eyjafirði sem er talinn hafa átt sér stað í kringum árið 1000. Halldóra var kona Víga-Glúms og er mannúðar hennar getið í sögunni þegar hún að loknum bardaganum hjúkraði vinum jafnt sem óvinum.

Það er von afmælisnefndar og allra er standa að undirbúningi afmælisins, að hjúkrunarfræðingar fái notið ársins og láti ekki væntanlega kjarabaráttu skyggja þar á heldur haldi uppi merkjum hjúkrunar og mikilvægi hjúkrunarfræðinga og kynni með stolti starf sitt og framlag þeirra til heilbrigðisþjónustu landsins.

Afmælisnefndina skipa Steinunn Sigurðar formaður, Aðalbjörg J. Finnbogadóttir, Ásta Möller, Sigprúður Ingimundardóttir og Þorgerður Ragnarsdóttir.

2019



FÉLAG ÍSLENSKRA
HJÚKRUNARFRÆÐINGA
1919 - 2019

